



Pareri dil president

Caras commembras, stimai commembers

Dapi nossa davosa radunonza generala ei pér biabein in miez onn vargaus, ed en miu pareri da gliez temps vaiel già giu rapportau sur dil passau digl'emprem miez onn, vul dir, per midar giu inagada astgel jeu schanegiar vus cun scrivanzas pli liungas.

La radunonza generala il davos d'uost 2022 a Vilters, cun il concert da Pascal Gamboni duront igl'apero, ei stada bein visitada ed ei vegnida schazegiada fetg dil presents, tgei ch'ins sa deplorablamein buca raschunar dallas sentupadas suandontas el secund miez onn. Ina excepziun ei segir la sentupada rumantscha cun lotto el november stada, nua che varga 50 persunas han priu part e nus havein astgau passentar in emperneivel suentermiezd in cuminonza rumantscha.

Daco che las ulteriuras sentupadas han buca anflau vossa beinvuglientscha capeschel jeu veramein buc. Vies pauc-interess munta en mintga cass ina pulita sfida per la suprastonza d'anflar autras sliigiuzions per il futur. Ei plaيدا per sesez che vossas propostas e vos meinis en caussa ein fetg beinvegni, fagei pia nez dalla pusseivladat da formar, ensembleme in cun la suprastonza, il program per il decuors digl'onn.

Igl'emprem "Caffé Rumantsch", che ha giu liug ils 25 da fevver 2023 a Buchs, ei staus in fetg bien success, aschia che nus previn segir ina cuntinuaziun da talas sentupadas! Avon la radunonza generala 2023 ha lu aunc la sera da heighels a Haag liug, cheu sundel propi fetg spanegiaus sin vossa participaziun. Vinavon ha la suprastonza naturalmein aunc entginas autras ideas per sentupadas per igl'onn current. Auter che tochen da cheu fagein denton, avon che far gronda lavur pil gat dad organisar talas, mintgamai ina questunada per entelir vies interess.

Nossa radunonza generala ha liug uonn sapientivamein el Landgasthof Linde a Berschis, pia empauet pli datier da nossas commembras e da nos commembers che habiteschan ella regiun dil lag Rivaun e plinengiu. Il diember da tals commembers crescha stedi ed els han igl'entir onn in pulit viadi (sco senz'auter era tals dalla Val dil Rhein) per mintgamai serrender als exerchezis da cant ed allas sentupadas che han, per la pli gronda part, liug a Ragaz Bogn e contuorn. Cun vossa presenza alla radunonza generala a Berschis musseis pia buca sulet vies interess per l'Uniun Rumantscha, mobein era ina certa solidaritad visavi ils commembers da pli lunsch entuorn. Per levgiar empauet il viadi a Berschis vegn, sch'igl'interess ei avon maun, organisau in bus adequat per tals che habiteschan denter Landquart e Berschis. Las annunzias persunter pren il president bugen

encunter ensemen cun l'annunzia per la radunonza. Da niev entscheiva la radunonza già allas 16.00 uras, aschia che tals ch'ei pli spert unfis, pon lu aunc serrender silsunter ad uras a casa.

Igl'onn da cant 2022 ha, cun igl'oreifer success a caschun dils 2 concerts da primavera ad Aschera e Ragaz Bogn, entschiet en bein per nies chor. Cun nies cant a caschun dil patrosinium a Weesen, ensembleme in cun il chor da baselgia da Quarten, nua che jeu sundel medemamein president, havein nus procurau cun la Missa dona nobis pacem da Gion Balzer Casanova per in ulteriur punct culminont. Naturalmein han duas canzuns rumantschas era buca astgau munchentar quei di. Ina dunna pli passada ha detg a mi suenter messa: "vies cant ei staus aschi bellezza, jeu vaiel giu larmas els eglis e sundel sesentida per in mument sco enten tschiel"! Ulteriurs commentaris ein cheu danvonz!

Il cant rumantsch anfla era en la diaspora gronda suatientscha ed ei tuttavìa buc ord moda. Quei muossa buca sulet mo il diember carschent da nies chor che dumbra pil mument grondius 47 del, mobein era las damondas per seprentar ad in publicum pli e pli vasts. Aschia ha il chor survegniu damondas per seprentar uonn a diversas occurenzas el contuorn e vinavon era en tiara rumantscha. Per buca surcargar cantaduras e cantadurs havein schizun già stuiu desister a pliras damondas per produziuns dil chor.

L'entschatta digl'onn da cant 2023 ha il chor dau a caschun digl'apero da Daniev a Maiavilla. Cun nies concert da primavera che ha liug ils 23 d'avrel a Ragaz Bogn ensembleme in cun il beinenconuschent organist Hannfried Lucke, il cant duront il survetsch divin ils 9 da fenadur a Maiavilla e vinavon a caschun dalla Pardanonza ils 20 d'uost a Cumbel, ed ad ulteriuras occasiuns, pren il chor bugen encunter la sfida da far tutta honor al cant rumantsch. Jeu sundel perschuadius che quei vegn a gartegiar oreifer. Quei buca sulet en vesta dil grond engaschi dalla dirigenta Monika Arpagaus e dil vicedirigent Hans Fäh, mobein era sche jeu vesel cun tgei plascher cantaduras e cantadurs fan part als exerchezis da cant ed als concerts.

Caras commembras, preziai commembers, cun vossa beinvuglientscha e stedia partizipaziun allas sentupadas gideis era vus da promover e mantener il bi lungatg Rumantsch! En quei senn, engraziel fetg ed ad in bien seveser allas proximas sentupadas rumantschas e naturalmein era allas occurenzas da nies chor.

Mols, il fevver 2023, vies president

Rinaldo Caduff